

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





3 2044 019 845 684

B
8878
2
25

B8878.2.25



Harvard College Library

~~FROM~~

By Mail.

17 April, 1888.

Cura

HARVARD
COLLEGE
BY

IV, 26/8

INFORMATORIUM
BIBLIOTHECarii
CARTHUSIENSIS.



Basel, Switz. — Bartholomäuskloster.

INFORMATORIUM
BIBLIOTHECarii
CARTHUSIENSIS

DOMUS VALLIS BEATÆ MARGARETHÆ

IN BASILEA MINORI

EX AUTOGRAPHO

FRATRIS

GEORGII CARPENTarii

IN BIBLIOTHECA BASILIENSI ASSERVATO

NUNC PRIMUM EDIDIT

LUDOVICUS SIEBER

UNIVERSITATIS BASILIENSIS BIBLIOTHECARIUS.


BASILEÆ

EX TYPOGRAPHIA SCHWEIGHAUSERIANA

MDCCCLXXXVIII

B 8878.2.25

IV, 2698



By mail

VIRO DOCTISSIMO INTEGERRIMO CONSULTISSIMO

ANDREÆ HEUSLER

LEGUM PROFESSORI ORDINARIO

ANTECESSORI ILLUSTRISSIMO

BIBLIOTHECÆ ACADEMICÆ BASILIENSIS
CURATORUM PRÆSIDI

AMICO JUCUNDISSIMO

DIE XVII MARTII A. MDCCCLXXXVIII

QUINQUE LUSTRA

IN PROFESSORIO MUNERE FELICISSIME PERACTA
SOLEMNITER CELEBRANTI

SACRUM.

Sunt nonnulli, qui librorum comparationi resistant. Attendant hi, quod sequitur, utpote quid sit monasterium sine libris.

*Monasterium sine libris est, sicut
Civitas sine opibus,
Castrum sine muro,
Coquina sine suppellectili,
Mensa sine cibis,
Hortus sine herbis,
Pratum sine floribus,
Arbor sine foliis.*

*Jacobus Louber,
Prior Carthusiæ Basiliensis.
(1480—1501.)*



INFORMATORIUM
BIBLIOTHECarii SEU LIBRarii
DOMUS VALLIS BEATÆ MARGARETHÆ
IN BASILEA MINORI
CARTHUSIENSIS ORDINIS.

CONTINENS
XII CANONES SIVE REGULAS INFORMATIVAS
OFFICII SUI.



uia (prout continetur in 2 parte Statu- 2.
tutorum antiquorum ca. 16. §. 9)
libris nostris omnem diligentiam
curamque præbere monemur, ne
fumo, ne pulvere vel alia qualibet
forde maculentur, (quippe [§. 10] quos tanquam
sempiternum animarum nostrarum cibum cautissime
custodiri et studioſissime volumus fieri, ut quia ore
non possumus, dei verbum manibus prædicemus;
quot enim libros scribimus, tot nobis veritatis
præcones facere videmur, sperantes a domino mer-
cedem pro omnibus, qui per eos vel ab errore cor-
recti fuerint vel in catholica veritate profecerint,
pro cunctis etiam, qui vel de suis peccatis et vitiis
compuncti, vel ad desyderium fuerint patris cælestis
accensi), fatis claret, quantum studii debeamus Biblio-

theis nostris, quave cura sit invigilandum ei, cui librorum fuerit iniuncta custodia. Quæ tametsi Sacristæ peculiariter commendata sit, (prout patet par. 1. an. c. 34. §. 9 ubi dicitur, quod libros seu legendos seu transcribendos a Sacrista poscimus et accipimus, et c. 41. §. 31 eiusdem: Sacrista libros cum accommodantur scribit, pignus retinet et custodit), si tamen alteri vel ipsi talis obedientia, servandorum scilicet librorum, fuerit commissa, iuxta subsequentes canones seu informationes procedere potest et debet, ut ordinis voluntatem et domus consuetudinem rite servare possit.

CANON PRIMUS.

Bibliothecarius diligenter sæpius utramque Bibliothecam respiciat, quatenus libri singuli singulis suis armariis recte sint illocati. Et quos aliter quam decet iacentes offenderit, recte componens interim aspiciat, si schedulae dorsales sint agglutinatae vel non, aut scriptura caduca, vel aliquis alius defectus ab extra appareat. Item si claufuras reppererit in libris confractas aut avulsas, quam cito potuerit, faciat reparare.

CANON SECUNDUS.

Utriusque Bibliothecæ Registra diligenter legat et relegat, quatenus in promptu nosse queat, quid deficiat, vel quid requiratur ab ipso, tam ab in-

traneis quam ab extraneis, sæpius recursum habendo ad Repertorium universale totius librariæ, five magnum Registrum, in quo specialia continentur.

CANON TERTIUS.

Bibliothecarius diligenter tempus observet, quando Libraria sit purganda vel registranda. Quod sane cognoscet ex certo peculiari registro super hoc noviter facto, quod dicitur Ufuale etc. Nihilominus tamen quotiescunque viderit Blattas, id est librorum vermes, vel pulverem aut situm redundare, præfidenti primum hoc intimet aut indicet, ex cuius iussu remedium postea apponatur. Porro prout habetur scriptum in veteri registro de manu P. Jacobi Louber, quondam huius domus prioris, singulis annis semel deberet registratio fieri; sed quia non semper videtur esse necessarium, maxime in antiqua libraria, cuius volumina rarissime alienantur, ideo sufficere videretur, quod semper in anno bissextili, id est in quarto ibidem fieret registratio solemnitas. Interim tamen sæpius debet repurgari vel a blattis emergentibus excuti. Non sic de nova (nisi deessent libri recentiores registrandi) quæ ad minus de biennio in biennium debet perlustrari, eo quod illius volumina frequentius ad cellas deportentur vel alias alienentur. |

Similiter et libraria fratrum laicorum ad minus ^{2 b} infra biennium registretur vel saltem perlustratur, eo quod volumina illius nondum sint ordinate fig-

nata, quemadmodum libri latini, et quod contingat complures perire seu amitti, nisi sæpius perquirantur, prout alibi patet, nempe in Registro Ufuali et in Registro librorum vulgarium. Qualiter autem hæc eadem registrari debeat, patebit infra.

CANON QUARTUS.

De purgatione librariæ etc.

Cum libraria fuerit purganda simul et registranda, non simul hoc fiat eodem tempore, id est ne utraque simul purgetur aut registretur. Nam hoc Conventui foret nimis onerosum, sed alternis temporibus in altera earum laboretur, prout oportunum fuerit. Et tunc in Ufuali registro describatur, quid factum sit, qui codices deficiant, quid immutandum etc. Porro cum libraria solum purgatur, non est necessarium libros e cellis sursum portari, sed dumtaxat quando registrari debet.

CANON QUINTUS.

De modo purgandi librariam.

Cum libraria purganda fuerit, hoc modo procedatur. Quando a præfidente fuerit iniunctum in laboribus communibus librariam purgandam, Librarius disponat aquam, veteres pannos sive femicintia (*alt hüdln lumpen*) etc., scobaria parva (*kleine besemlin*) etc. Deinde iuvante Conventu divisim per

armaria singula, quantum locus capere sufficit, primo libri de suis armariis defursum per ordinem depellantur super mensam vel ad terram ordinate secundum litteras suas et numeros, quatenus citius postea reponi possint ad loca sua. Deinde singula scamna illa seu intersticia paululum humectentur pannis illis sive femicintiis, dein statim lota reficiuntur. Interim vero libri excutiantur a blattis et situ infidente, id est pulveribus ab intus et extra. Postea scamnis exiccatis ordinate reponantur a summo usque ad deorsum. Tandem pavimentum omne purgetur, licet interim frequentius debeat aspergi, quatenus pulveres excitati resideant. Cætera patent ipso usu, quod conveniat, nec ne. Porro librariam laicorum purgat frater ille, cui commissæ fuerit, quoties necessarium esse perspexerit.

CANON SEXTUS.

De modo registrandi.

Quando libraria fuerit registranda, primo provideatur de glutino biblio (*um gûte starke bappen*). 2^o omnes libri, qui in cellis habentur, fursum reponantur; ii videlicet, ad quos altera librarium spectat, id est, si nova sit registranda, ii reponantur universi, qui spectant ad novam etc. Et hoc convenientius fieret hebdomada præcedenti labores communes, vel faltem una die, quatenus expeditius in labore isto procedatur. 3^o mittatur pro libris

accommodatis iuxta designationem Registri Recognitionum, quatenus omnes codices sint præfentes. Et Recognitiones remittantur illis cum excusatione etc.

4^o Cum omnes libri in singulis armariis suis fuerint locati, legatur Registrum librariæ, quæ registratur, et videatur diligenter, quis liber desit, qui mox seorsum in schedula describatur et postea requiratur. Pariter videatur, si schedulæ dorfales librorum sint ablatae vel male cohærentes aut caducae etc., quatenus illico restaurentur, si fieri possit, antequam libri deportentur. Porro notandum, quod aliquando in parvis libellis, maxime in armariis E et I, tituli ex integro in dorfis eorum non sunt consignati, quemadmodum in Registris continetur, propter schedularum parvitatem. Quare si dubium oriatur, respiciatur ab intra in capite libellorum, ubi similiter tituli exarati cum registro magis concordantes inveniuntur. 5^{to} perspiciantur loca vacantia, quæ libris signandis, si assint, suppleantur. Nam et tales similiter sursum portari debent, licet nondum sint signati. Et tunc de eis iudicetur, quo quique tales

3 a sint reponendi, | specialiter curando, ne tales in armariis incongruentibus reponantur. Nam melius est nonnulla loca vacare, quam libros inordinate locare. Cum autem tales libri sic (ut præfertur) ordinantur, statim titulus et numerus abintus inscribantur, vel in schedulis aut cartulis designentur, ne per oblivionem contingat errare postea. Sexto videat librarius, ne libri deportentur, donec plene cognoverit omnia bene et certissime signata et aptata, ne postea

cogatur laborem intolerabilem subire, si deprehenderit quippiam neglectum, quod ad hunc registrandi modum deservit. Nec novos libros patiaturs auferri, sed eos secum ad cellam deferat, donec fuerint abintus et extra et ad Registrum signati sicut cæteri. Etiam interim, dum libri adhuc in armariis sunt, si nonnulli deficient, eos faciat diligenter inquiri, etiam si opus fuerit per cellas, sicut et patres seniores facere solebant. Nam sæpe ex oblivione contingit aliquos in cellis retineri. Septimo his rite peractis, si librario videtur commodum præfidenti subindicet, quod libri possint ex illius licentia iam recipi, iuxta morem consuetum, nempe ut singuli per ordinem a senioribus usque ad juniores sibi placitos recipiant codices, quotquot voluerint, singillatim tamen, usque ad triginta, non plures, de consuetudine domus. Quod si forte aliqui specialem licentiam haberent peculiare libellos, quibus prius utebantur, ante communem receptionem asportare, hoc librarius admittere potest, postquam fuerit expeditus, licet non videatur expedire propter murmuraciones, excepto priore etc. De Registratione librorum vulgarium videatur notula in capite Registri eorundem.

SEPTIMUS CANON.

De libris quando accommodantur.

Quia de Sacrista statuta dicunt, quod libros, cum accommodantur, scribit, pignus retinet et custodit, si eidem Bibliotheca non sit commissa, Li-

brarius hoc faciat. Porro non accommodet libros extraneis, etiam quibuscunque, sine speciali licentia præidentis. Et tunc ab illis exigat Recognitionem proprii chirographi, quam seorsum reservet penes se in scriniolo Recognitionum. Deinde libros accommodatos statim (ne obliviscatur) inscribat in Registro Recognitionum, annotando personam, diem et annum, etiam voluminis litteram et numerum. Notandum quoque, quod conclusum fuit per Conventum annuente priore, ne passim quibuscunque extraneis accommodentur libri, nec studentibus quidem aut sacerdotibus ignotis, nisi forte tales essent, quibus hoc prior negare nequiret. Et hoc pariter debet intelligi de libris vulgaribus. Similiter nullus conventualium accommodet ulli extraneo librum quempiam sine licentia præidentis et absque scitu librarii, etiam si infra triduum liber foret restituendus.

OCTAVUS CANON.

De libris vulgaribus.

Quia libri vulgares, id est linguæ germanicæ, commissi sunt Cellerario, qui eos propter fratres laicos in speciali armario seorsum iuxta dormitorium eorundem conservat custoditos, ne per ipsius negligentiam aut incuriam libri pereant aut deteriorescentur, eum librarius interdum monere debet, ut eos diligenter respiciat, et nonnunquam excutiat a pulveribus, si opus fuerit. Nec passim eos singulis fra-

tribus exponat, nisi quantum expedire videatur annuente præfidente, diligenter notando, quos exposuerit vel accommodaverit, quatenus si ex eis nonnulli forte ab aliquo conventualium requirentur, citius possint inveniri vel restitui. Nec ullo modo quempiam ex illis extraneis accomodet sine licentia superiorum et absque scitu librarii, qui speciale registrum eorundem penes se semper retinere solet. Porro de his, qui ad librariam latinam signati sunt ex vulgaribus, Cellerarius se non intromittit etc.

NONUS CANON.

Quando Librarius aliquos libros ex pristinis armariis suis mutare voluerit vel transferre (quod non absque labore gravi fieri solet), quid facto opus sit, videatur in capite registri generalis. Expedire tamen videtur, quod raro, nisi necessitate cogente, libros transferat, nedum propter laborem et difficultatem | Registra corrigendi vel alterandi etc., sed etiam propter displicentias et inquietudines conventualium, quibus hinc occasio datur suspicandi vel murmurandi de lana caprina. Unde providendum est, quod in omni registratione deinceps futura libri, quantumcunque fieri possit, in locis propriis iacere sinantur, maxime propter Repertorium universale utriusque librariæ. Transposito enim quovis libro necesse erit numerum quoque et litteram transponi. Et contingit sæpe in eodem volumine plures libros contineri sub eisdem numero et littera, quod valde

laboriosum esset alterare in dicto repertorio. Et quanquam aliquorum iudicio plurimos codices necesse foret transponi, eo quod materiæ eorum non respondeant vel congruant titulis armariorum, in quibus locati sunt, quod satis indecorum et inordinatum iudicatur, licet aliqui ad diversa possint armaria reponi propter diversas materias, sed quia propter dictas causas potius superfedetur a tanto labore. Expectandum proinde videtur, donec libraria Nova repletur, et tunc necesse erit et opportunum, ut alteratione facta libri vetusti et pene inutiles ab utraque libraria segregarentur et ad certum locum deportarentur, vel ad speciale armarium novum propterea construendum reponerentur et libri magis utiles et preciosiores in nova libraria collocarentur, porro scripti vel alii non tam utiles in antiqua libraria servarentur, et novum fieret repertorium. Tamen hæc omnia non sine grandi labore fieri possent. Et esset hoc negotium Conventui exponendum, deinde certis anni temporibus, scilicet in operibus communibus, successive (non simul) perficiendum, deo prestante, ad cuius honorem et utriusque librariæ decorem hæc omnia peragantur.

CANON DECIMUS.

De libris novis.

Quicumque libri novi supervenerint nondum ligati, statim librarius (si ei fuerit iniunctum) eos perlustret, id est videat, ne ullus sit in eis defectus,

et cum hoc deprehenderit, mox defectum illum significari faciat ei, unde libri tales supervenere. Deinde titulos eorum inscribat seorsum in schedula. Postea faciat eos complanari, rubricari, colligari secundum temporis opportunitatem. Deinde faciat eos inscribi per se vel priorem, unde provenierint cum assignatione titulari, prout in aliis libris consuetum est, quanquam nondum sint ad librariam cum numeris deputati. Expedire enim videtur, quod prius inscribantur iam commemorata una cum litteris pro armariis congruentibus, quo facilius postea possint registrari. Nullum denique librum sursum faciat reponi, nisi sufficienter antea præparatum.

UNDECIMUS.

Ad idem.

Si libri novelli sint tenues aut parvuli, five diversarum materiarum, id est quod competant ad diversa armaria, non faciat eos simul ligari, nec pariter faciat eos nimis tenues colligari, sed expectet, eosdem reservando, donec plures aggregentur etc. et juxta materiam congruentem. Hoc idem sentiendum est de libris vulgaribus, nisi forte prior iuberet aliquos tales statim colligari. Nec pariter librarius accommodet tales non ligatos libros conventualibus aut secularibus, ne distrahantur aut maculentur aut certe minus abiles ad ligandum reddantur, nisi de licentia præsentis.

CANON XII.

De libris Chori, quanquam magis spectent ad tutelam Sacristæ, nihilominus tamen Librarius diligenter eos respiciat, siquid forte fuerit in eis instaurandum, præsertim in his, cum quibus divina celebrantur officia, quatenus mundi et integri ferventur, si Sacrista foret negligens. Porro si quid in eis esset emendandum, hoc spectat ad Emendatorem.

Insuper tamen eos peculiarius respiciat, qui in armario Chori positi, etiam ad librariam sunt signati. Nam ii solum ob hoc ibidem sunt locati, siquid dubietatis vel quæstionis oriretur in terminis seu dictionibus aut cerimoniis ecclesiasticis, ut non cogamur semper sursum ad Librariam currere, sed statim ad manum habeantur.





INDEX SIVE CATALOGUS ..

LIBRORUM PRO ARMARIO CHORI

QUI ETIAM AD LIBRARIAM SUNT SIGNATI.

(Nec omnes ex his, sed aliqui in eodem armario habentur.)

VOCABULARII.

Catholicon. A. i.

Breviloquus. A. iiii. A. xii. A. xiii. A. xiiii.

A. xv etc.

Mammætractus. A. ix. A. iii. A. xxvij. A. xliii.

A. lxvij.

Predicantium. A. v. A. vi. A. lij. A. lx. A. lxiiij etc.

Rerum. A. 18. A. 51. A. 62.

Ex quo. A. cxlix. A. vii. A. xix. A. xxxiiii.

A. xxxix. A. c. A. cxlix.

Valde bonum A. cxxxix p^{mi}

Opus pacis. A. cxxxix. 27 et

A. 30

Iti duo libelli defer-
viunt pro accentibus
biblicis in ordine con-
fuetis.

SERMONES.

Sancti Bernardi. D. i. Qui frequenter super annum in refectorio leguntur.

Capitulares. D. xx. D. xxij.

S. Augustini. In exequiis fratrum. C. ix.

LEGENDÆ SANCTORUM.

Lombardica. C. lxxviii.

B. Sylvestri papæ. C. ix.

B. Brunonis. C. ix et C.

Item Rationale divinorum. H. xxj.

Ludolphus de vita Christi, in quatuor voluminibus pergamenicis scriptus, pro lectura Refectorii. F. iii ter et F. iiij semel.

Statuta antiqua in pergamenis.

Glosa Statutorum scripta. E. cxlvij.

Hos itaque vel consimiles necessario conservari oportet in dicto armario Chori vel faltem aliquos ex eis, qui sub formis in Choro procuratoris iuxta introitum locantur, ut sunt ii, ex quibus in refectorio continue legitur, quatenus tales semper ad manum habeantur, et non sit opus hincinde discurrere. Nec cuiquam licet eos ad cellam deportare, nisi mox restitutus. Et licet aliqui ex eis sint ad librariam signati, tamen specialius huic loco deferviunt, unde ad discernendos eos in doris suis iuxta literas suas habent ascriptum ly. Chori. Sunt præterea complures alii libri, qui tum in Choro, tum in cellis

habentur, de quibus librarius se non intromittit, nisi specialiter iussus. Nam in armariolo pulpiti choralis continentur Statuta impressa, Liber Evangeliorum scriptus, Exequiale, Sermones capitulares etc. Porro in cellis habentur diurnalia cum breviariis, psalteriis, cursibus, ordinariis etc. juxta sufficientiam opportunam. Insuper et pro singulis cellis Statuta noviter (1510) impressa. De quibus is, cui cellæ vacantes commendatæ sunt, requirere habet, aut magister Novitiorum, ut sciatur, quid ad singulas cellas necessario in talibus requiratur, sive deficiat. De missalibus autem, antiphonariis, et homeliariis biblicisque voluminibus atque collectariis, ad Sacristæ pertinet officium.

NOTULA POSTREMA.

Expedit, ut Librarius generalem licentiam a priore capiat pro egrediendo cellam, et pro sollicitiori cura sui officii, utque valvas utriusque bibliothecæ sub aura serena aperiat et imminente tempestate, pluvia, nebula hiemalique tempore claudat. Sicut enim pluvialis aura plurimum codicibus obest, ita serena vel ventosa prodest.





EPILOGUS EDITORIS.



Informatorium Bibliothecarii, quod tibi, benevole lector, data solemnī occasione nunc primum publici juris factum offero, e codice Basiliēsi A. R. I. 2 signato desumptum est, quem ab initio usque ad finem frater GEORGIUS CARPENTARII DE BRUGG, Carthusiæ monachus professus (1509—1529), propria eademque nitidissima manu exaravit. Tria folia in capite voluminis posita Informatorium occupat, reliqua vero «Registrum pro antiqua bibliotheca» continent.

Omnia, quæ de duobus Carthusiensium bibliothecis, de Informatorio nostro et de fratris Georgii vita et scriptis scitu digna sunt, diligentissime collecta et uberrime illustrata invenies in Chronicorum Basiliensium tomo primo (pag. 236, 313 et 359), quem ante hos sedecim annos auspiciis Societatis historicæ Basiliensis edidit Guilelmus Vischer, amicus candidissimus, quem præmatura morte nobis bonisque litteris abreptum etiamnunc graviter lugemus.

Coronidis loco ea hic subnectere placet, quæ frater ipse Georgius de libraria domus Vallis beatæ

Margarethæ in Continuatione chronicorum Carthusiæ (loc. cit. p. 328) narravit. Verba hæc sunt:

«Superest, quantum dicta domus sub venerabili patre JACOBO LOUBER DE LINDOW in temporali substantia succeverit. Imprimis de bibliotheca, in qua ceu granario quodam spiritali uberrimus consolationum internarum proventus et sempiternus animarum cibus, statutis ordinis testantibus, est reconditus, pauca perstringenda sunt. Igitur bibliotheca, quæ ante eundem pastorem quasi pæne nulla erat, quantum sub eo libris ac codicibus pro omnium artium ac scientiarum facultate referta fuerit, unusquisque facile conjicere poterit, si titulos exteriores, id est eos, qui in frontispicio singulorum, ipsius eiusdem propria manu conscriptos aspexerit. Singuli quippe codices bibliothecæ nostræ singulas in se continent notulas, diligenter, a quo quisque provenerit, exaratas. Igitur ultra mille ducentorum voluminum extendit se numerus, sub eodem patre cæteris codicibus veteribus adjectus, quorum tamen maximam partem dominus JOANNES DE LAPIDE, sacrae paginæ doctor, ordinem ingressus secum apportavit. Denique tantus excrevit codicum veterum et novorum acervus, ut opus fuerit binas construi bibliothecas, alteram veterem, in qua codices vetustiores et scripti continerentur sub ordinali numero vulgari consignati, alteram novam sub cyfrali numero pro noviter impressis et futuris reponendis, cum suis propriis registris et intitulationibus singulorum armariorum, mira quadam et singulari novitate dictos codices ordinatissime collocandi. Quo nimirum patet, quantæ vir iste sagacitatis et industriæ

fuerit ac laboris indefessi, qui tantum potuerit se in talibus defatigare, in qualibus vix otiosissimus quisque monachus semetipsum agitare vel exercere dignaretur. Sed quam ob rem? Equidem reor: non ob aliam, nisi quia litteras ex animo charas habuit, et quia noverat, quantum utilitatis et quietis in solitudine versantibus amor litterarum pariat, tum quia decorem domus dei dilexerat, quem bonorum librorum copia non parum commendat utique præ cæteris ornamentis universis.»

Sed hæc satis multa vel plura potius quam necesse fuit. Optime vale, amice lector, veteremque librarium, hoc die festo undecimum vitæ lustrum claudentem, proseguere favore benigno.







3 2044 019 845 684

The borrower must return this item on or before the last date stamped below. If another user places a recall for this item, the borrower will be notified of the need for an earlier return.

*Non-receipt of overdue notices does **not** exempt the borrower from overdue fines.*

Harvard College Widener Library
Cambridge, MA 02138 617-495-2413

**STALL-STUDY
CHARGE**
WIDENER
FEB 13 2009
CANCELLED

Please handle with care.
Thank you for helping to preserve
library collections at Harvard.

